

文
762
912
3:3
部 =



中国国家图书馆
NATIONAL LIBRARY OF CHINA

師竹廬聯話卷五

錫山拙翁寶鎮編輯

學校

泰興學宮明倫堂懸偶語曰學以致道致堯舜禹湯文武周公孔子之道堂以明倫明君臣父子夫婦昆弟朋友之倫浙江嘉善明倫堂聯曰瑞曜應三台果然彩徹雲衢巒舍文光齊射斗畢比分片席笑指門盈桃李河陽手植幾經春時婺源江君湘嵐爲邑令兼理學事故有此作吾邑明倫堂屏門鐫堯舜之道孝弟而已矣夫子之道忠恕而已矣此堂近爲工藝校借用數年未瞻仰焉某省學宮懸楹帖云道與天地參功滿天地名滿天地書留春秋



中国国家图书馆
NATIONAL LIBRARY OF CHINA

在知我春秋罪我春秋福州府學門聯曰方千里育賢之地第一
重入聖之門婺源江湘嵐大令宰嘉善時題學宮仰高亭聯云經
之以文水緯之以武塘破浪乘風大有魚龍紛變化上不負天子
下不負所學讀書論世睠懷山斗倍流連文水武塘二池名在學
宮內下聯用先哲陸宣公語東洲船山書院彭宮保倡議建有偶
語云海疆歸日啟文場須知回雁傳經南嶽萬年扶正統石鼓宗
風承宋派更與重華敷衽成均九奏協簫韶又確山銅川書院聯
云文武繼諸周好爲汝南增月旦弦歌開廣廈定因言偃得澹臺
俱衡陽王君湘綺手筆船山書院又有聯曰講席鎮名山滙通漢
宋諸儒東下江河資保障遺書垂道統坐到春秋佳日南來鴻雁
助弦歌石鼓書院聯曰是七二峯雄雉所鍾看砥柱中流莫但賞
靑草煙痕朱陵石蹟溯廿六灣波濤而上聽鼓歌五夜應不減船
山燈影嶽麓書聲俱新化周君芍衫手筆

湖北漢口紫陽書院夏觀川太史撰楹帖云到南渡後誰知孔聖
人尙存卽今日仰廟貌於黃鶴樓前無非是秋陽江漢便北朝中
也問朱先生安在想當年寄學規於白鹿洞口何處尋汴水錢塘
何秋槎太史題韓山書院聯曰五載賦棲遲看桑海婆娑南珠正
媚三山憶儔侶願天風鼓盪北斗常依粵中白雲書院戴醇士侍
郎撰偶句云疑是娜嬛别有洞天開世界曾經滄海不如泉水在
山中院在西樵白雲洞口侍郎督學粵中遊樵留題之作詞旨澹



遠真不食人間煙火者

江蘇淮安清河縣學宮懸楹帖曰博學審問慎思明辨篤行修其
天爵君臣父子夫婦昆弟朋友教以人倫某縣學宮有集句聯曰
堯舜之道孝弟而已矣夫子之道忠恕而已矣禮云禮云玉帛云
乎哉樂云樂云鐘鼓云乎哉婺源江洲嵐大令題魏塘書院聯曰
數間廣廈隨時局變遷自萃古樓就荒僅留得一片紫雲往迹何
堪譚劫火幾度論文與諸君小聚仿梅花亭故事適飛下千年老
鶴回翔猶誤聽羲經書院舊在城南有萃古樓供紫雲石一座後
圃梅花亭爲明儒李荆陽講易處毀於兵火邑紳得城北曠宅改
葺之移石於此題聯以誌今昔之感又於斜塘書院作偶語曰星
火數漁莊文水一泓蕩漾光芒齊射斗兩華霏雁塔法輪千佛標
題名士共梯雲此院文水漾在其南雁塔寺在其西北

寶山西郭外有別墅名西壇爲鄉先生講學之地金君履祥撰楹
帖云致知而意誠治國齊家大學在自新其德修身則道立高明
博厚至誠固悠久無疆潘勁庵孝廉撰棉州書院聯曰沙螺堡環
處千家州有序黨有庠於斯地春誦夏弦毋安固陋白鵝潭汪洋
萬頃澄不清淆不濁願諸君礪名砥節式是儀型雲南崇正書院
有聯云崇實黜華儒生本色正誼明道學業淵源吾邑惠山寺塘
涇紫陽書院某君作偶語懸於柱云可以居高明遠眺望是能說
禮樂敦詩書宜興蜀山東坡書院饗堂懸聯云何必木奴千頭但



楚頌亭成香滿洞庭皆逸興本無郭田二頃况荆溪船入山懷西館
蜀卽前緣係楚人唐仲冕手筆按東坡客宜興以此山似蜀名曰
蜀山並擬築楚頌亭買田種橘於此

河南洛陽縣學宮有楹帖云道若江河隨地盡成洙泗聖如日月
普天猶是春秋某首學宮柱懸錢君聯句云遵道而行學者必以
規矩誨人不倦煥乎其有文章江西贛州濂溪書院某君撰偶語
懸於饗堂云我生近聖人居教澤如新敢忘魯壁金絲尼山木鐸
此來繼賢者後流風未泯竊願士崇禮義俗尙弦歌榮昌敖比部
題川南書院聯云居今仙人白玉堂小子勉之好與文昌儲將相
名魁多士黃金榜吾道南矣莫將温飽負平生此院由文昌宮改
建比部時爲院長有望切士風蒸蒸日上之意焉

陝西鳳翔府學宮某君撰偶語云德行本焉文藝末焉當先本而
後末實勝善也名勝恥也宜賈實以循名其內西南隅文昌閣有
聯云見一十七世宰官身繼帝王而宣化爲千億萬年斯文主參
天地以同流勞辛階尙書崇光題西陽龍潭書院聯曰黃卷青燈
結習難忘到此地暫停使節墨池蔬圃流風未泯願諸君遠紹前
型墨池蔬圃本黃山谷遺蹟時勞公赴雲貴任道經四州所作四
川夔州府萬縣白崖書院有聯曰此地自黃庭堅奉詔東歸南浦
西山故里早鍾名士氣相傳是李太白讀書遺址錦心繡口諸君
誰繼謫仙才此爲趙翼之太史所撰甚覺貼切今其地爲蠶桑校



舍矣張棠本太守撰瀘州鶴山書院楹帖云鳴鶴在陰回思春夢
一場捧檄昔曾騎鶴去高山仰止笑說清風兩袖授書今又入山
來太守曾肄業此院後捷禮闈一麾出守騎鶴揚州怱怱三十八
年祇同幻夢耳今致仕入山講學徘徊几席感而作此

江西贛州府陽明書院懸楹帖云薪傳本孟子七篇吾道不孤况
此地曾留手澤梓里溯姚江一派典型未泯與諸君同蕪心香金
陵鍾山書院嚴君貫公撰聯曰舊蹟重新產生幾輩英才來從劫
後古人長往猶有六朝山色青到窗前又作聯曰最難我輩少年
時莫放餘閒好料量春夏干戈秋冬羽籥此是古人讀書處且等
芳躅須記取司馬論史公羊傳經其內又有番禺陳掌教所著博
學於文行已有恥及山水崖谷有以自老道德文章多從之遊兩
聯某地麗澤山房柱懸偶語云以吾從大夫後有朋自遠方來此
係李滙川廣文守制講學時集四書句而成也

徐州府宿遷縣鍾吾書院其大廳有某君所撰楹帖句云岱爲四
岳之宗自梁父云亭以來經臯繹龜蒙磅礴馬陵岡上秀挺三台
應放登山眼孔河乃百川並灌由崑崙積石而下合汴沂淮泗透
迤宿預城邊瀾迴九曲宜尋學海心源羅羅清疏曲而能達武進
雪堰橋道南書院懸偶語云春和讀法冬旭飲賓觀於鄉知王道
易易爾淳水謳歌夫椒弦誦登其堂喜諸生彬彬然此李紫璫大
令手筆宜興蜀山東坡書院屋宇寬敞其西廡有楹帖曰挹先生



趣可醫吾俗對此山面有如水清其後樓柱懸聯曰事去物無參
神超興有餘此兩聯俱張君殺組所題焉

江西廣信府信江書院中一榻軒懸上饒王溫如偶語云翠幔朝
開珠簾暮捲濁醪夕引素琴晨張院內有文起樓以木根鐫魁
像祀之懸楹帖云酒仙詩佛同千古月色江聲共一樓又樂育堂
有聯云琢質繡章國之良幹攬英接秀世有令名其內春風亭有
二聯一係春能蘊藉如相識風入襟懷只自知一係蝶銜紅蕊蜂
銜粉花有清香月有陰經訓堂有五言聯曰文章開竅奧經訓乃
菑畬又聯曰仰誦堯舜言俯遵周孔轍游思竹素園寄辭翰墨林
以上均王君集前人句而作毫不牽強

浙江杭州西湖敷文書院有楹帖云四時之樂具在於此六藝之
義不盡於斯作者未及詢明四川瀘州鶴山書院錢塘錢學使棧
撰偶語云魏了翁講學之區鶴鳴子和尹伯奇撫琴於此山高水
長相傳尹伯奇爲瀘人有撫琴臺遺跡某省楓溪書院婺源江洲
嵐大令題聯云結習笑吾曹與諸君把酒論文綠蟻尊中浮竹葉
清風留里社訪令舉舊廬故宅白牛涇上徧桃花周春華題文出
書院聯曰漠地擁高臺過仙洲第二灘平分片席吟風月晚唐多
秀士讀石室五千卷別有新詩上相公浙江温州永嘉縣中山書
院有康樂堂懸聯曰吾人歌詠慚康樂自古江山說永嘉係地方
紳士乞李石農觀察撰書



浙江陸軍小學堂懸偶句云十年教訓君子成軍溯數千載祖雨
宗風再造英雄於越地九世復仇春秋之義願爾多士脩鱗養爪
毋忘寇盜滿中原讀此氣爲之一壯吾邑顧宛溪先生祖禹弱冠
時貧甚爲里塾師歲得脩脯止六金以半與婦俾就養婦翁家餘
盡市紙筆燈油於其學堂題一聯云夜眠人靜後早起鳥啼先其
自勵如此著方輿紀要日草數條或以事曠必夜不寐以補之熟
於山川阨塞戰陣攻守之畧洵偉人也

太倉唐蔚芝侍郎文治愛吾邑山水秀麗就城中西隅購地建宅
佈置園林楚楚可觀遂遷居無錫焉光緒間爲上海南洋公學校
長已閱多年近由吾邑紳士捐資在學宮左首重建尊經閣落成
後侍郎於此設國學專修館以主教開幕之日賀客盈座見板對
有二係唐君集句而成其一云進以禮退以義中天下而立誦其
詩讀其書等百世之王其二云富貴不能淫貧賤不能移威武不
能屈所存者神所過者化好學近乎智力行近乎仁知恥近乎勇
雖愚必明雖柔必強陶會元世鳳集成語爲賀聯其句係何以利
吾國時遺讀我書同善分社社員孫君鳴圻以楹帖賀云大啟讀
書堂正本清源欲爲徧國中存碩果永傍尊經閣顧名思義從知
斯道外無傳薪錢茂才鑑瑩撰偶語賀之曰國粹永保存挽江南
文運學堂宏教育得天下英才高茂才鼎業作長聯賀之曰國學
實本於家塾黨庠州序教溯羲軒道宗堯舜功高禹稷法備湯文

帝有謨王有訓創業紹千秋先聖後賢皆一揆專修不外乎正心
克己治人師承孔孟志契顏曾派衍程朱思深韓柳朝而考夕而
稽守身無二致積年累月足三餘余亦贈以楹帖云闕發六經學
館衍聖賢餘緒甄陶多士鬻宮看桃李成陰無錫中學校贈聯云
溯漢京園橋觀聽以來衛道干城端賴傳薪火得孔門舞雩詠
歸之樂嘯歌惠麓庶幾闕里遺風不知作者姓名東林學堂有聯
云學所以教忠嚴名分重綱常崇正黜邪遵大道士期於報國辨
人禽昭懲勸同心協力輔中朝係家孝廉士鏞所撰

師竹廬聯話卷五終

師竹廬聯話卷六

錫山拙翁寶鎮編輯

廨宇

江甯府江浦縣署大堂聯錢塘袁太史枚撰句云城郭瞰長江敢
無端妄起風波有如此水衙齋環列岫看不改本來面目只在斯
山縣城離江僅五六里北及東西三面山環雄而無秀氣浙江貢
院儀徵阮芸臺宮保所撰之聯久膾炙人口經粵匪蹂躪燬於兵
火亂平浙之士大夫重修廳事復懸楹語曰三五夜月當頭看滿
天金粟香飄興大衆同參悟境九萬里風在下覽隔岸銀山溽湧
到此時亦讓文瀾氣勢浩瀚與阮作可頡頏

兩江節署司道官廳柱懸偶語是曾相國所撰其句云雖賢哲難免過差願諸君讜論忠言勤攻吾短凡僚屬畧同師弟待大衆行成名立乃盡我心淮北運使署臯園徐淮生代某君撰聯云羣樹合參天更兼入座花開長使名園留勝蹟萬方正多事只此一官匏繫不知何術對蒼生應敏齋廉訪任江蘇臬憲時以署中楹聯無佳者屬德清俞蔭甫編脩更易因撰大堂聯云讀律卽讀書願凡事從天理講求勿以聰明矜獨見在官如在客念平日所私心嚮往肯將溫飽負初衷又頭門楹帖云聽訟吾猶人縱到此平反已苦下情遲上達舉頭天不遠願大家猛省莫將私意入公門上聯是善句下聯乃俞編脩所易

武邵孟大令承謨由進士於雍正元年來宰吾邑清剛明敏豪猾悚息禁賭博及婦女入寺焚香舊時縣官相驗人命自儉從胥吏作下逮甲總恆集百餘人費輒數十金武令一切屏省距城遠者操扁舟挾二吏徑至屍所立決之事主不耗一錢以勞瘁得疾猶惓惓於民旣歿邑人祀之惠山又入文廟名宦祠其大堂楹帖曰人人論功名豈卽功名功有實功名有實名存一點掩耳盜鈴之私心終爲無益官官稱父母何謂父母父必真父母必真母做幾件懸羊賣狗的假事總不相干又日照月臨天有難逃之眼民窮財盡地無可剝之皮頭門聯云視民如傷錫邑蒼生皆我子修己以敬東林前輩是吾師照壁聯云罔違道罔拂民正直公平心



斯無忤不容情不愛賄招搖撞騙法所必嚴

長白斌僕少良爲前任兩江總督玉公德第八公子嘉慶己卯庚辰之間官蘇松糧道駐劄常熟署後卽虞山也有小樓可以望遠題曰辛峯一角樓與吳中諸名士讀畫論詩殆無虛日自題一聯云羣彥集東南有溫李詩才荃熙繪事高樓占西北挹石梅香月辛嶺晴雲年未四十著書盈尺矣

陝西學使署柯遜菴撰楹帖云結習未忘袖中攜一卷雌騷美人香草觀風所至天外見三峯落雁玉女蓮花許寶衡廉訪能以文雅飾吏治重修廣西臬署題四照山房聯云嶺外費經營獨秀峯前虧鏡易廬中論事業孔明臺畔結鄰難又題唾綠亭聯曰從星巖風洞而來別開生面於月榭雲窗以外高置此身嘉興王蔭明撰偶語懸於平樂府富川縣署二堂云好民所好惡民所惡甯人負我毋我負人桂林府陽朔縣花廳有聯曰故鄉無此湖山看象嶺霞蒸鶴塘雲淨今夕只談風月趁楓絲春脆桂蠹秋肥係楊鹿生明府丹壽手筆

乾隆初山東徐公士林開府吳中嘗設宴滄浪亭欸待士紳教民節儉撰楹帖懸於大堂云三秋剛報賽休辜美景良辰請先生閑談談問地方上士習民風何因何革五簋可留賓何用張燈結彩教百姓都看看想想平日間競奢鬪靡孰是孰非薛太守書常題蘇州貢院聯曰文教開言子曰學道曰愛人願諸生無忘所本鄉賢



式范公爲名臣爲循吏從此地先植厥基李紫璠大令超瓊顯江城
陰縣署聯云帝澤如春看庭前草色蔥蘢願境內都舍斯意江城
如畫聽郭外潮聲滄海疑民間尙有不平會稽吳留村大司馬興
祚令無錫時撰驛站聯云驛路控吳津君子至斯嘗得見水程通
惠麓好山相對欲忘言貼切渾成

長沙徐定生大令以大挑出知贛榆縣事題縣署二門聯曰我亦
知才力無多重門洞開期使下情毋壅爾各以身家自保百事惟
忍勿因小忿輕來山陽縣署懸楹帖曰不食民一粟不受民一錢
乃吳隱之爲太守先天下而憂後天下而樂是范文正做秀才廣
東廣州督署內書齋聯云居敬行簡可使南面爲政以德譬如北
辰曹伯謬爲寶安縣署中聯云寶善親賢嘗奉教君子安民和衆
請從事斯言又聯云失德由寵賂章昔賢以不貪爲寶得情存哀
矜意吾心因無枉而安嵌寶安二字亦覺自然

四川藩署內乃園三百梅花山館許紫蘊方伯題楹帖於其中云
漫說梅花三百樹不見放翁料月白風清也要化身千億試向錦
江萬里橋來尋工部問秋光春色可能讓我幾分方伯又有聯曰
此是荔裳百梅亭舊基况一壑一邱又從秦樹蜀山攜來粉本恰
與上谷古蓮池相似對斯臺斯榭更覺荷花秋水動我鄉情乃園
爲嘉慶間楊荔裳任川藩時所築光緒甲辰許紫蘊由陝藩移蜀
重葺斯園補種梅花三百樹并於園北隙地鑿池栽蓮其風景與



保定古蓮華池頗相似

酉陽州署中清舫亭善化張廣楠撰偶語云二酉舊藏書訪巖洞遺蹤斷簡已無人宛在一琴新治譜看山川生色憑欄遙見鶴歸來張君又題秀山縣署二門聯曰此邦亦號成都四面雲山開活野勝地舊名高秀一江春水繞邊城四川兵工廠有聯云兵不在多攻心爲上工欲善事利器必先瀘州劉珊洲司訓樂山縣懸聯云海棠香國世界荔枝紅處人家蓋衙中海棠甚盛家有荔枝數百株故云然

閩縣王可莊殿撰仁堪守潤州於郡齋東偏隙地小有結構竹籬茅舍楚楚可觀其同鄉葉臨恭孝廉大莊撰楹帖贈之曰郡齋讀書借官地二畝江城如畫看煙樹萬家周沐潤宰常熟時榜一聯於縣門曰五日風十日雨歲乃常熟九年耕三年食民其姑蘇徐州府署大堂懸偶句云逞着性子這裏來官雖恕法不恕留點功夫那頭幹耕固高讀尤高

陝西鳳翔縣大堂閣文介公代某君作偶句云我若賣法腦塗地爾敢欺心頭有天痛快之至楊蘇甫先生題西安武闈聯曰漢代徙豪傑實關中迄今汗渭遺風猶稱雄武國家以弧矢威天下願得干城偉畧上應旁求又聯云三輔故多才駟鐵雄風猶近古八荒今無事羽林衛士盡通經又題沔縣公廨聯云毋博寬大名去害馬乃能牧馬敢云清白吏惟嗜魚故不受魚漢中權局楹帖亦

楊蘇甫撰句云握算愧非長惟自勵一腔冰雪牽車來不易要
留幾點脂膏又撰權局客室聯曰入芝蘭室久而不覺去關市
征今茲未能南通顧君曾烜作宜君縣署大門聯云左馮翊要衝
南道北道袤九十里而遙行旅出其塗商賈藏其市古昇平樂
統上城下城暨卅五社之衆農夫怵於野官吏慶於庭於幕寮
斯是陋室我有嘉賓之句諸聯俱侷儻渾成

成都將軍入都祝嘏楊蘇甫先生作偶語於其行署云松州舊
殿前軍克奏膚公入覲帝城雙鳳闕桃實新開天上宴欽承手
詔同稱王母九霞觴鉅傳善題四川德陽警察廳聯曰警爾頑
民有恥且格察於上下防患未然徐琴舫學士於鄴都考棚大
門撰楹帖云舉一人焉拔其尤是鸚鵡之初漫云小試行千里
者始於近聽鹿鳴在後當有奇材衙後有鹿鳴寺卽東坡聽鹿
鳴處也又題看卷房聯曰醒眼辨丹黃曾記當年辛苦否輕心
違黑白其如後世子孫何觀此則閱文者宜刻刻留心不敢偶
忽矣

熱河無城郭四面皆山崇文正公綺任都統時作聯云四望雲
山皆壁壘小栽花木驗農桑鎮江府署二堂戴淵鄰太守題楹
帖云居一日官盡一日心無怠蕪荒當思於物有濟治百姓難
愛百姓易同好同惡惟在強恕而行李黻臣太守題大堂聯曰
作官當守官箴便留十分神也怕我忙中錯了保民須求民隱
偶試三尺法要替他堂下想來傳猷著大令題縣署法廳楹聯
曰我也不會做

官積半點陰功減些罪惡你們何須告狀留幾貫錢鈔貽於子孫
某大令撰偶語懸於縣署大堂云爲親民官何以克勤厥職行快
心事但求無愧於天

雲南高等審判廳吳某代唐啟虞題楹帖云世界三權法亦特權
獨立示尊嚴竊願後有來者西南諸國滇爲大國百城忝表率
期下無冤民胡文忠公林翼撰釐金局聯云天子何忍傷民財
小醜猖狂擾茲守土地丁不足濟軍餉願大家慷慨輸此釐金
唐薇艸官臺灣時題廨署聯曰安得廣厦萬千種竹權爲留客地
倚徧回欄十二惜花仍是愛才心頗有風趣

陝西宜君縣署大堂南通顧君曾烜題楹聯云揆度衆情以宜吾
民保障繭絲或者辱區成沃壤被服儒術而君斯邑刀筆篋篋將
毋俗吏勝經生又題耀州署儀門聯云郡以鑑山有光得名或稱
宜州崇州輝州北雍州輿志具存控馭朔方資鎖鑰地於井宿所
次爲域翳若傅氏柳氏梁氏令狐氏人文迭起爭衡上國蔚冠裳
又作偶語於其二堂云北雍峙雄州在昔爲左輔屏藩六城師帥
東邠稱沃壤至今有成周風土七月詩篇

某省寶安縣署大堂懸偶句云縱橫百里比古諸侯惟此土地人
民政事是寶南北一家屬今衆望願爾父子兄弟夫婦俱安西安
府醴泉縣巖南書院東側號舍鱗次爲歲科童試之所南通州顧
某於其大堂撰楹帖云立鵠盡英雄入鼓早符唐帝語噦鸞無小



大觀旂都誦魯侯詩又堂柱聯曰曾是昔年辛苦地安得廣厦千
萬間有張麟年者名士也戲作贈知縣聯云下官拚萬個頭向上
司磕去爾等把一生血待本縣絞來又戲作贈知府聯云見州縣
則吐氣見道臬則低眉見督撫大人茶話須臾只解得說幾個
是是有差役爲爪牙有書吏爲羽翼有地方紳董袖金贈賄不
覺的笑一聲呵呵呵繪影繪神足供談笑

西安府耀州署二堂懸楹帖云川媚山輝看二水潑洄諸峯羅列
年豐歲稔有四城供億百里謳歌其內宅聯云施於有政是亦爲
政宜其家人而后教人集句天成且確切官署中內室某縣令因
年歲大荒飢民徧野捐廉設施粥廠朱竹垞先生作聯云同是肚
皮飽者不知饑者苦一般面目得時休笑失時人含蓄有味可爲
世態炎涼下一鍼砭揚州馬棚灣驛站有聯云紅樹怨離亭辜負
我柳陌菱塘江村如畫秋風催客棹怎奈他鱸魚葦菜鄉夢牽人
家曉湘孝廉客揚州時所題

四川藩署有乃園樊蔭蒸撰楹帖云對風月累千觴與君今夕傾
談借箸預籌天下事拓園林十數畝無論明年何處栽花先釀萬
家春某君爲邑令題其署之二堂聯云爲委吏矣爲乘田矣從大
夫之後有民人焉有社稷焉非諸侯而何張文襄題廣州督署內
書齋聯曰不犯秋毫岳武穆能寒夏膽范希文宋范仲淹字希文
鎮延安時夏人相戒曰小范老子胸中有數萬甲兵



金陵上元縣署舊懸偶語係袁子才太史宰是邑時所撰句云眼
前百姓卽兒孫莫言百姓易欺須留下兒孫福澤堂上一官稱父
母漫道一官好做要盡些父母恩情其愛民之意溢於言表今之
膺民社者其三復斯聯六安汪筱潭少極寒苦習裁縫業一日其
師以足扶其腦痛極逃歸憤而讀書未久入泮連捷南宮出爲藥
州府年老告歸後見家鄉縣署傾圮解囊建築題楹聯云山水有
清音願賢父母援琴而理春秋多佳日勸鄉人士歸耕勿來詞旨
委婉頗得詩人忠厚之意

師竹廬聯話卷六終

師竹廬聯話卷七

錫山拙翁寶鎮編輯

庵院

金陵妙相庵四面修篁涼翠凝袖中有一亭額曰小淇澳詩僧某
撰聯云翦一片綠雲補衲留三分皓月看經佛室聯云半箇蒲團
天地老一聲清磬古今空妙在可解不可解之間杭州南高峰下
理安寺有靜室三楹俞蔭甫編修題聯曰竹篔潛通十八澗蒲團
小坐兩三時蓋俞君每游九溪十八澗必至此小坐也

湖南西禪寺重建落成王湘綺撰偶語懸於其柱云彈指見華嚴
看天馬雲開一角小山藏世界觀心禮尊宿聽木魚晨叩十方古



德應齋期湖南無十方叢林一方大缺典也普明上人嘗議以西禪寺公之法侶示寂後法裔秀枝上人願成之棟宇狹小香田租少懼不副衆望運本寺中道徒尤惴惴焉乃有碧崖和尚以無邊宏願行不思議功果且捨且募不三年成百萬大工斯實海內希有之事也又題東洲禪寺聯云竹樹護精廬林鳥似識前朝事鐘魚答弦誦芋火還容宰相分衡府東洲羅漢寺乃前明舊刹王君主講船山書院與此寺主任柏永禪師相鄰十年因題柱以誌因緣又題彭縣多寶菴聯曰山中晝永看花久樹外天空任鳥飛指彭縣牡丹甚多而言也於伊山禪院又作聯曰明月似聞三弄笛白雲長對六朝山王君所撰者俱灑脫渾成

京師永定門外有倒坐觀音庵中懸一聯云問大士緣何倒坐恨世人不肯回頭十四字點醒一切京師拈花寺爲萬柳堂故址湯文端公金釧題楹帖云蒹葭秋水尋開土楊柳春風憶相公純皇帝南巡駐蹕嵩山適越南貢九色玉如意九柄因卽留鎮嵩山麓之禪院中某公撰聯曰嵩呼萬歲天保九如瀘縣北巖寺楊升庵題聯云半空樓閣千山繞兩岸人家一水分亦自然

江甯報恩寺客堂懸楹帖云天半插浮圖殿閣晶瑩三界上雲中現忉利樓臺金碧六朝前鎮江玉峰菴陳寅谷集漢郃陽令碑字成偶句云白雲旣開遠山出如涌清風所至流水織爲文鐵良題鎮江松寥閣有新渚忽生波島外舊題多在薜蘿中之句又題自



然菴有虛閣半涵江樹影小堂長護海雲深之句某君撰焦山定慧禪院石坊聯云天闢海門容大隱人從石室學長生漢焦光隱此山下江峽名海門

蘇州寒山寺以唐時僧寒山得名在楓橋鎮西北面臨大溪幽秀獨絕葉昌熾撰楹帖云木屐樺冠世外寒巖終古相傳如雪竇鐘聲塔影出塘精舍到今依舊屬雲陽孫毓騏有聯曰此間無江上風波寄語豐干休饒舌依舊是橋邊霜月追懷張繼再留題安嶽竇鎮山遊此作偶句曰待詔碑殘重新廟貌留書卷蒲牢夜吼依舊鐘聲到客船某君於此作五六月間無暑氣二三更裏有鐘聲之句胡壺禪亦題一聯懸於佛堂句云佛以語言文字爲禪若教楓落吳江饒舌出袖中詩本寺有泉石樓臺之勝直抵圓開祇樹點頭徧郭外山光諸聯均瀟灑風流

徐蘭畦先生筮仕淞江於慈谿南塘定海均有惠政補嘉興通守見時事多不愜上書西臺卽以言事落職旋里後隱居於錫山之石浪菴以花木自娛每日黎明虔拜大學一篇按章句而靜思之並焚香參拜仙佛杜少京司馬題偶語於其廬曰靈境隔凡塵天地湖山收一覽虛堂羅寶像聖賢仙佛任同參又七字對云但做得來皆事業若推不去卽因緣尤覺意味深長徐君隱於此之前十餘年菴中懸有一聯云五里湖光七層塔影幾排石浪半嶺松聲係山僧乞先大父所撰書

揚州興教寺彌勒龕王仙溪齊學裘合作偈語云笑呵呵坐山門外
外覷著去的去來的來皺眼愁眉都是他自尋煩惱坦蕩蕩載在
袋中休論空不空有不有含哺鼓腹好同我共享昇平某君題
勒佛像聯云忠恕慈悲三教之中無異理飛潛動植兩間以內盡
生機秦榮光題彌陀殿聯曰儘爾輩使陰謀放開大肚皮容物憑
自家尋樂境便取笑面孔對人彭春洲撰楹帖懸於某地金蓮庵
句云卧蓮瓣讀書是天人福慧見桃花悟道須來者聰明妙諦名
言非鈍根人所能領會

姑蘇鄧尉山聖恩寺有純皇帝御製聯曰萬頃湖光分來功德海
千重花影勝入旃檀林蘇城外西園天台劉文珍撰楹帖云最難
得過人來相逢香火有緣卽色卽空正婆娑春夢一場蘇臺啼鳥
何處尋乾淨土大好園林無恙宜晴宜雨却彷彿西湖三月花港
觀魚西園離留園半里卽戒幢寺放生池池多魚鱉而鼉尤龐碩
寺內有五百羅漢極莊嚴瑰偉之致陸雲蓀有聯云三吳選佛場
此地居然新結構百族消劫運上天無處不慈悲

江津四大王廟楊建屏題楹聯云坐佛門安百丈之身此爲大人
而已順天道布四時之氣豈曰小補之哉天目山韋馱殿錢塘丁
修甫中翰立誠撰偶句云尊者是童身願學人猿伏魔降永作祖
山真佛子如來有天眼看此地龍飛鳳舞特開靈境古精藍某君
於韋馱閣作楹帖曰聖門季路道教玄壇鼎足共成三護法努目



金剛低眉彌勒同心齊向一如來江陰城外送子殿有聯曰你是
孝子慈孫自當照樣送你他能光宗耀祖還須積德與他作者未
知某處有送子觀音庵龕懸聯云觀世無如觀自在好心定有好
兒來亦楊建屏手筆

浙江上虞縣西二十五里蘭芎山有福仙寺明倪文貞公元璐曾
讀書於此嘗題一聯云山深鳥語皆成韻畫靜僧房半是雲鎮江
焦山寺枯木堂懸楹帖云昔曾瘞鶴一碑尙存書自古人紛辨論
試比臥龍三詔不起山因高士並留傳又曾文正公聯曰似聞陶
令開三徑來與彌陀共一龕江津鍾耘芬爲張某祈子題羅漢殿
聯云人相我相壽者相斯真法相爲俗士現三千界羅漢身須知
佛卽是心心卽是佛前因後因夙世因各有來因願菩薩放五百
道嬰兒乳居然孫又生子子又生孫筆曲而能達

鎮江迴光精舍金家宜題聯云百尺巖松生琥珀九秋海樹長珊瑚
梁悅聲於此撰楹帖云身來姑射高無極心有菩提香益清又
陳壯度於此作尋碑寺外雲生屨看月江頭雪滿衫之聯周思溥
亦留題舉杯依嶺邀明月拂紙臨江繪古詩之句狼山之麓有荷
花池花香水潔池上有亭柱懸偶句云風定波平看千花萬葉放
大光明現菩薩化身等相天空海濶願一切衆生破除苦惱向清
涼世界中來王瓊澤遊狼山愛其景而題此句也

古崇安寺爲梁溪首刹大殿懸楊可園所作偶語云西竺來一丈



六尺身鐘鼓旛幢復能崇釋安禪大地山河留鹿苑南朝荆四百
八十寺樓臺煙雨曷若靜修慧悟中天日月煥龍章又懸秦凌滄
少司寇瀛所撰楹帖云定裏證安禪象教萬年開佛宇靜中生寶
慧龍文兩字見天心其左有火神殿丁植卿孝廉撰楹聯云偕星
辰日月以同光功參化育合水土木金而相濟福佑平安其右有
中隱院三世佛龕懸聯云度衆生之有緣慈航東域歷千劫而不
占果證西方柱懸過謙齋益集禊帖字聯曰少室清修仰期惠可
大山靜契領悟文殊惠可人名左下數丈有三官殿龕掛聯曰今
夫天今夫地今夫水不貳不測位乎上位乎中位乎下資始資生
屋宇不多近日又添供二十八宿等像

南通州城北有土山曰鍾秀山西曰西山又西曰西山寺內有古
松一株數百年物也李小湖學政聯琇撰楹帖云松生何代古復
古寺在鍾山西又西大庸陳桐喈逢元作天門寺大門聯云天作
高山山高作鎮門通大道道大通神又於正殿作偶語云仰驚六
宇寬變成幾多雨幾多露幾多雪幾多風和雷時出時入時往時
來多少神奇誰鎖住俛視衆山小看破一箇嵩一箇衡一箇恆一
箇泰與華自東自西自南自北箇中底蘊此平分何士果太守壽
朋題廣東大埔西巖山寺聯云勝地匹陰那惜坡老未來致令晦
跡千年巖壑林泉哀古月登樓瞻悟始問仙人何處賸有殘棋一
局河山風雨愴神州陰那山名赤嶺靈覺寺悟始堂相傳爲了



拳師牧羊所

廣東佛山觀音殿鄧瓊石廣文撰楹帖云願爲楊柳瓷瓶一滴水
灑三千世界尙有芙蓉粉本百花賤寫億萬觀音吳平齋題焦山
定慧寺妙香閣有雲連鷹島白水抱象山青之句韓國鈞題鎮江
自然菴有靜觀得衆妙展席俯長流之句梧州準提閣許月樵太
守作偶語云有神仙到處卽是名山風月佳時憑管領待老佛歸
來重開福地樓臺畫裏好登臨狼山準提庵姚純夫撰聯云不作
風波於世上別有天地非人間恰合山寺禪房地位

常熟維摩寺踞虞山之巔其東見海樓比五楹中龕祀景州刺史
肖巖屈公寺爲屈氏家山樓爲公所手建有楹帖云鐘磬定山聲
昔有白雲招刺史欄欄接海氣遙看紅日照維摩開窗遙矚黃流
一線吞吐於依微竹樹間破曉登此可觀海中日出數里外有名
藏海寺者門榜聯曰山中藏古寺門外盡勞人曲折行百餘步又
有石形陡絕者名三沓石謂上如舟中如几下如斛畧具形似鑿
石聯曰絕壑雲扶將墜石豁崖風勒下奔泉爲沈啟南題又有偶
句鐫於石上云風巖畫激諸天雨陰壑寒生萬樹濤王元美手筆
是佳景之遠近繞寺者也

金陵雞鳴寺正殿懸楹帖云浩劫歷紅羊歎江北江南惟茲選佛
名場留住六朝佳勝在平湖飛白鷺更蓮花蓮葉現出莊嚴法界
好同一幅畫圖看又聯曰湖水經秋平似鏡蓮花破曉白如霜寺



內幣蒙樓傅文江撰偶句云偕同輩著屐登臨聞道是十里芙蓉
六朝煙雨有大士居山倒坐怕看那故宮花草廢井胭脂又曾
襄有聯云松雲山下無多地煙雨寺中第一樓某地送子殿懸聯
云上帝本好生求我與以兒女不求我亦與以兒女下民須自愛
爲善報在子孫爲不善亦報在子孫勸勉意頗深

杭州西湖孤山南聖因寺第一進爲彌勒殿第二進爲大雄寶殿
第三進爲觀音閣西邊爲方丈昔年李巡撫敏達所撰二聯已載
他書不必錄焉寺內有樓臺亭閣池石花木諸勝景西湖山房懸
偶語云蒼靄望中收四面湖光依几席薰風行處徧六橋花柳間
桑麻澄觀齋懸楹帖云雲窗靜挹峰巒秀花徑平分松竹香涵清
居有入座煙嵐鋪錦繡隔簾雲樹繞樓臺之句光碧亭有千峰林
影簾前月四壁波光鏡裏天之句俱係御題理安寺在南山十八
澗正殿有楹聯云勢到岳邊千峰環秀色聲歸海上萬水拱洪濤
又淨慈寺聯云雲間樹色千花滿竹裏泉聲百道飛亦御筆

惠山爲吾家最近之山出試泉門數里卽至余壯盛之年偕友登
絕頂遙覽太湖及四面風景心胸爲之頓豁頭茅峰道院懸楹帖
云得道湖華陽應憶前生證果藏真來福地先知後世因緣又有
聯云萬福攸同同此心同此理自然獲福諸天贊化化善男化善
女共樂昇天二茅峯寺中居羽流二三人柱懸偶語云昆季接真
元繼世而興登蕊闕峯巒綿古迹潛靈之所見華陽三茅峯殿亦

奉道教正中楹聯曰鶴駕歧靈修想當初羽葆成真記在華陽
仙洞龍峯標勝跡看此際香雲結篆何殊勾曲名山以上數聯均
合道教口氣惠山之麓有白衣殿其禪室壁上畫一墨龍屏列四
字對云老龍聽法頑石點頭庭前一石孤峙高七尺環植花木
青繚白倘所謂頑石者非耶

金陵虵山麓烏龍潭上有駐馬菴薛慰農山長題聯云水如碧玉
山如黛鳳有高梧鶴有松金陵妙相菴頗具園林之雅王紫仙撰
楹帖云斐前樓閣未全灰祇剩得半折磬一卷經五更鐘六月涼
風三冬積雪雨後園林無限好最愛是百本蕉千條柳萬竿竹數
聲啼鳥幾寸游魚鎮江夕陽樓某君作聯云去無所逐來無戀月
自當空水自流鎮江金山麓有笑佛庵某君題偶語云笑嘻嘻看
著你來應把那一些孽錢施捨咱布袋和尚意拳拳都向我拜何
不作百般善事免累他草把兒孫惠山麓文昌宮丁植卿孝廉撰
聯曰十七世士夫道啟文明億萬世數百言寶訓源從道德五千
言犢山元山大王殿丁孝廉代丁子霖作楹語云虎口脫餘生當
年風送一帆幸仗威靈完骨肉犢山崇廟貌終古浪淘千頃永綿
香火惠黎元磬湖尖真武殿重建落成吾友汪寶素茂才撰聯懸
於饗堂云獨峙波心水德崇隆昭北極重修廟貌山容平澹挹西
神青圻大王廟新築戲臺汪茂才題聯曰臺榭喜初成看寒碧千
層遠青一角冠裳傳勝事聽梨園舊曲菊部初聲



酒仙殿酒業營建在吾邑東郭第二進楹帖云有酒便消愁請看
真人足官府無心思借枕願隨夫子上天壇施叔愚廣文建烈撰
又聯曰一飲三百杯喝月倒行霄漢碧隻身數千里臨風長嘯海
山蒼楊茂才殿奎撰第三進神龕施廣文書聯曰一劍掃殘氛遠
勝中山千日醉三杯通大道願邀上界片時閒旁有趙大令起鵬
作偶語云塵夢警黃梁一醉先聲開呂祖豪情餘赤壁千秋定論
屬曹公又有朱茂才恩沐著聯云五十年富貴榮身一夢醒來看
破世間多少事千百載神仙妙術九丹成後度過天下往還人第
四進神龕丁孝廉培撰聯云何以解憂萬古消愁還與爾不妨作
俑此鄉沈醉卽封侯其左供玄壇有施廣文題執鞭我亦思求富
騎虎人宜善保盈之句其右花廳三間前後均布置池石花木所
懸聯家孝廉士鏞有二一係玉宇生寒正天上綺筵開處金樽引
滿問江邊黃鶴歸無一係臺榭依然我適閒游向湖海林巒如許
誰能痛飲亦神仙丁孝廉又作楹帖云酒國有長春三醉樓頭記
否親吹玉篴仙家多好夢一炊黍許何妨再續黃梁王潤生題聯
曰萬事付沈冥酒國溪山堪入畫太和歸醞釀醉鄉花鳥亦長春
陳郁皆茂才建藩有聯曰壺中日月方長斗仰南天丹藥共延千
歲壽花外溪山如許壇留東郭白雲常護一庭春此聯燬於咸豐
庚申兵燹王學師有贊補書

南通白衣庵供大士像有樓一楹名望海樓懸包召棠所撰聯云

龕護白雲是大士雙趺坐處樓觀滄海惟達摩一葦杭之鎮江焦蘭
山寺松寥竹塢許中丞乃釗撰楹帖云眼底江山皆淨域毫端蘭
竹見靈源某省天門寺內韋馱閣陳桐喈作偶語云金甲金神人
仗一杵打開妖魔不言護法方成護法鐵圍鐵門限能隻身尋出
路徑要說過關才准過關從前三清殿在吾城中觀前街北今改
圖書館其旁道院尙未毀雷尊殿懸蔡茂才延槐書聯曰上天無
私霹靂一聲驚世夢下民有欲電光萬道照人心火神廟有聯曰
借雷聲電影之威視人間善惡乘朱雀赤烏之瑞開天下文明張
仙殿神龕侯孝廉煒書弓影斜飛天上月彈丸拾得掌中珠之句
柱懸聯云子可送乎莫謂天上石麟不難惟吾所願仙真奇矣須
識階前蘭玉總由積德而來何人所撰未知

三河佛頂寺何秋槎太史撰楹帖云與了拳同衍南宗古柏傳香
覺路有誰登佛頂記行腳來從東浙黃梅留偈空山曾此證禪心
平陽某寺觀音閣懸聯云是西方之人如在其上推南海而準乃
位乎中吾城東隅四箭河頭有藥師菴古刹也昔有庵主號蘭芳
者工詩詞善書其徒均恪守戒律咸豐庚申經兵燹片瓦無存有
滿霞法名通明塘頭鎮任氏子幼卽端厚凝重禪課之暇亦喜習
書甲子各省克復滿霞歸省時年屆不惑奮然興復此菴不數年
自殿堂以及旁舍廊廡皆次第重建大殿正間供藥師龕懸侯石
琴孝廉書壽佛經皆書貝葉喜神譜看寫梅花之句柱懸林少筠

太守所撰偶語云因報本相尋願鏟除九結十纏生彌陀靜域光
明常不滅得照見三乘四辨爲佛祖傳鐙客廳有聯云清風出林
萬籟俱寂明月在地一塵不生王莘鉏先生題

鎮江海西菴王可莊太史題聯云委質江山如許國寄懷魚鳥欲
忘形蘇州寒山寺在楓橋鎮西北胡念修撰楹帖云寒陵片石在
人間豐干挹袖拾得拍肩到今派衍天台東渡靈蹤續薪火大乘
宗風盛吳下支硎講經雲巖說法何似敲詩月夜南瞻佛性應霜
鐘又蒲九節遊此寺作寒葉濕樵徑山花生佛頭之句嵌字仍能
灑脫東門外延壽司殿舊有板對十餘副數年前某軍隊駐於此
兵丁以對板劈碎煮飯此處楹聯爲之一空嗟夫兵丁之爲患無
異紅羊小劫今所存僅戲臺石柱刻有一聯句云簫鼓迎神同使
黔黎登壽考冠裳煥彩好僧奎壁吐光芒

東京淺草觀音閣懸楹帖云寶鼎現莊嚴金碧裝成安樂剎佛光
呈壯麗雲霞照出普陀山日人有此漢文亦不可多得也鄧尉司
徒廟向有柏樹四株參天蒼鬱慣經風雷數百年前老樹也相傳
有清奇古怪名號純廟南巡爲題一聯云清奇古怪春常在風雨
雷霆劫不磨出語渾成不愧大雅吐囑吾邑望湖門外古南禪寺
柱懸偶語云地僻境清幽古木深林負郭禪房閒得趣塔高僧寂
靜折葵參筍戒壇法味老彌甘能貼切荒野寺院係沈葆三孝廉
祖約所撰

壽陽報恩寺大殿後有毘盧閣邗江張君樹德題楹句云藤杖一
條捉得起纔放得下禪關兩扇看不破便打不開越秀山觀音殿
李棣華作聯云現大士化身問誰仙佛因緣在卽越王遺蹟從古
英雄感慨多江津有一占寺其頭造龕供笑佛鍾耘芬題長聯云
你眉頭着甚麼焦但能守分安貧便收得和氣一團常向衆人開
笑口我肚皮這般樣大總不愁穿慮喫只講個包羅萬物自然百
事放寬心俱就禪意生發亦足勸世

師竹廬聯話卷七終





中国国家图书馆
NATIONAL LIBRARY OF CHINA